

# Levgiar il start a politichers communs

## Latiers gida in nov cumpendi

■ **(anr/gc) Il Center per il management administrativ da la Scol'auta per tecnica ed economia (HTW) a Cuira, sustegnì da l'Associaziun da vischnancas svizras, ha edi in cumpendi per mussar e levgiar il start a politichers e politichers communs.**

Auturs èn: *Curdin Derungs, Ursin Fetz e Dominik Just*. Quest manual dat ina vasta survista pratica pertutgant aspects centrals da la politica communal.

Il sistem guvernamental federalistic en Svizra è caracterisà fitg dal patratg da milissa. Consequentamain duajan vischinas e vischins na sulet pudair eleger e vuschar, mabain era daventar activs cun surpigliar responsabladad. Quai è impurtant da punctuar, pertge ils davos onns èsi sa mussà en bleras vischnancas pitschnas e mesaunas ch'igl è oz zunt difficil da chattar talas e tals ch'èn pronts da surpigliar uffizis communs.

I va adina pli vess da gudagnar candidatas e candidats per in mandat politic en vischnanca. Quai ha era sias raschuns. La gestiun en vischnanca daventa pli e pli complexa, la professionalisaziun crescha e medemamain las pretensiuns. Surpigliar in uffizi en la politica communal daventia adina pli e pli ina sfida, pia ina chausa zunt pretensiusa.

### Ins porscha bun agid

Motivar ed encuraschar latiers vul il manual ch'ils auturs da la HTW a Cuira han sviluppa. Els han entschavì tras intervistas cun politichers communs or da l'entira Svizra.

A basa da quellas han els deducì e declerà ils pli impurtants duairs ed obligaziuns dals organs politics communs. Orientà vegn era davart ils instruments da planisaziun e management, co manar ina vischnanca cun dar ina survista davart las cundiziuns generalas e la situaziun finanziaria.

Ils pli essenzials process, proceduras e dumondas vegnan intermediads a moda illustrada, chapibla ed era tras graficas. Constataziuns pregnantas da politichers e politicras schlucan la part teoretica. Cunquai ch'ins ha resguardà diversas terminologias chantunalas è il cumpendi duvraivel en l'entira Svizra.

Novizs èn pli spert da chasa en lur uffizi e tals ch'èn gia daditg activs pon duvrar il manual per guardar suenter. Chantuns, ch'èn interessads, pon laschar cumpletar il manual cun ina part individuala supplementara.

**S'informar pon ins era sut:  
[htwchur.ch/zvm-startpaket](http://htwchur.ch/zvm-startpaket)**